



*Komunikadu Imprensa  
Tribunal Distritál Díli  
11 Feveiru 2015*

**Tribunál Distritál Díli kondena pena prizaun tinan 16 ba arguidu kazu krime tráfiiku ho  
ema no violasaun seksuál**

Iha 05 Feveiru 2015, Tribunál Distritál Díli kondena arguidu BDS ba kazu krime tráfiiku ho ema no violasaun seksuál ho pena tinan 16 iha prizaun. Kazu ne'e akontese iha 2014, iha Gleno, Distritu Ermera.

Tribunál prova katak arguidu ne'ebé nu'udar xefe suku komete krime tráfiiku ho ema konjuga ho agravasaun no krime inklui violasaun seksuál hasoru lezada ne'ebé ho tinan entre 15 iha sertidaun batismu igreja katoliku nian no tinan 18 tuir sertidaun RDTL.

“JSMP apresia desizaun tribunál relasiona ho kazu ne'e, tanbá krime tráfiiku ema no violasaun seksuál hasoru feto ka menór nu'udar krime sira ne'ebé grave no dala barak akontese iha área rural ho motivu oi-oin. Pena tinan 16 bele sai lisaun ba comunidade no bele iha efeitu preventivu ba ema seluk atu la komete tan krime hanesan iha futuro,” dehan Luis de Oliveira Sampaio, Direitór Ezekutivu JSMP.

Tribunál prova katak arguidu habosok lezada no lori mai Díli atu trata nia dokumentu ba bolsu da mãe (bolsu estudu) iha Ministériu Soliedaridade Sosial, maibé la konsege trata dokumentus hirak ne'e. Arguidu lori lezada ba fali iha fatin apartementu ida iha Díli. Iha apartementu ne'e arguidu halo violasaun seksuál hasoru lezada no fó tutan lezada ba ema seluk hodi halo relasaun seksuál. Depois akontensimentu lezada isin rua.

Iha julgamentu arguidu konfesa katak nia faan lezada ba ema seluk maibe nega katak nunca halo violasaun seksuál hasoru lezada.

Maske nune'e, tribunál hetan prova prova hirak liuhosi teste DNA provadu katak lezada hetan oan hosi arguidu, hafoin arguidu konfesa katak nia halo duni relasaun seksuál ho lezada dalarua deit maibé la obriga lezada tanba hakarak ho hakarak. Maibe tribunál la fiar arguidu no prova katak nia komete krime violasaun seksuál.

Antes ne'e, ministériu públiku akuza katak, arguidu faan lezada, dalahat (4) ba ema seluk hodi hetan benefisiu ba nia an. Ba kazu ne'e ministériu públiku akuza arguidu kontra artigu 163 Kódigu Penál kona-ba tráfiiku ho ema no artigu 164 Kódigu Penál kona-ba agravasaun ne'ebé hetan pena prizaun tinan 12 to'o tinan 25 no artigu 172 Kódigu Penál kona-ba violasaun seksuál

Rua setubal, Colmera, Dili Timor Leste

PoBox: 275

Telefone: 3323883 | 77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl

ne'ebé hetan pena prizaun tinan 5 to'o tinan 15. Tribunál kondena arguidu ba pena prizaun tinan 16 ba krime rua ne'e hamutuk.

Tráfiku ba ema liu-liu ne'ebé envolve explorasaun seksuál no violasaun seksuál hasoru fetu ka menor ne'e fó impaktu negativu ne'ebé sériu ba fetu no labarik sira nia moris, tanba afeita direktamente ba sira nia psikolójia no saúde. JSMP enkoraza entidades hotu-hotu tenki konsidera katak krime tráfiku ema no violasaun seksuál hasoru fetu ka labarik nu'udar krime ne'ebé grave no enkoraza ema hotu atu kombate krime hirak ne'e.

Julgamentu leitura sentensa ne'e prezide hosi Dra. Jumiaty Freitas (reprezenta juis koleitivu), Ministériu Públiku reprezenta hosi Dr. Osorio de Deus no arguidu hetan akompañamentu hosi Dr. Rui Guterres hosi Defensoria Pública.

Atu hetan tan informasaun, favór ida kontaktu:

Luis de Oliveira Sampaio

Diretór Ezekutivu JSMP

E-mail: [luis@jsmp.minihub.org](mailto:luis@jsmp.minihub.org)

Telefone:+670 3323883 | +670 77295795